

Aasakkut nalunaaquttap atorunnaarsinnissaa suliniutigileqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Justus Hansen, Demokraatit)

Akissuteqaat

(Naalakkersuisut Siulittaasuat)

1. Siullermeerneqarnera

Naalakkersuisut aallarniutigalugu aalajangiiffigisassatut siunnersuut saqqummiunneqartoo qujassutigissavaat. Aalajangiiffigisassatut siunnersuummut saqqummiunneqartumut tunngavilersuutini oqaatigineqartutut siunnersuut taama ittoq Inatsisartunut ilaasortaasimasup Per Rosing-Petersenip 2016-imi Inatsisartuni oqaluuserisassanngortissimavaa.

Siunnersuutip taama ittu pingasut matuma siorna oqaluuserineqarnerani erseqqisaatigineqartutut aalajangiiffigisassatut siunnersuummut saqqummiunneqartumut Naalakkersuisut isumaqarput aasaanerani nalunaaquttap Kalaallit Nunaanni suli atorneqartarnera inatsisartut kissaataannik naammassinninnerusoq.

Aasaanerani nalunaaquttap atorneqarnera pillugu Inatsisartut inatsisaat Inatsisartut 1989-imi akuerivaat. Inatsimmi aalajangersakkat malillugit Naalakkersuisut aalajangersinnaavaat Kalaallit Nunaanni aasaanerani nalunaaqutaq atorneqassasoq, soorlu inatsimmi tamanna siunertarineqartoo. Danmarkshavn Pituffillu eqqaassanngikkaanni Kalaallit Nunaanni tamarmi aasaanerani nalunaaquttap atorneqarnera pillugu nalunaarut 1994-imi atuuppoq.

Europami Amerikamilu Avannarlirmi nunat tamangajalluinnarmik, ikittunnguit eqqaassanngikkaanni, kiisalu Amerika Qiterlirmi, Kangia Qiterlirmi, Amerika Kujallermi, Caribienimi, Australiami, New Zealandimi Sikuijuitsumilu Kujallermi nunat ilaat aasaanerani nalunaaquttamik atuisuupput.

Aasaanerani nalunaaquttamik atuinnginnissamut sanilliullugu nunarpassuarni Kalaallit Nunaanni innuttaasut, inuussutissarsiuteqartut oqartussallu ulluinnarni attaveqarfigisartagaanni aasakkut nalunaaquttamik atuisarnermik malinninnissaq ataatsimut isigalugu siunertamut naapertuunnerusoq Naalakkersuisut isumaqarput.

Tamatuma saniatigut Naalakkersuisut isumaqarput pingaarutilinnik tunngavissaqanngitsoq Kalaallit Nunaanni aasaanerani nalunaaquttamik atuinissamut akuersaarnissamut akерliunissamulluunniit. Nunani suleqatigisartakkatsinni aasaanerani nalunaaquttamik qanoq suli atuisoqartiginera pingaarnerpaavoq.

EU-mi aasaanerani nalunaaquttap atorunnaarsinneqarnissaannik EU-mi aalajangiisoqassappat uagut aamma aasaanerani nalunaaquttamik atorunnaarsitsissagutta tamanna Kalaallit

Nunaannut iluaqutaassanersoq pillugu Naalackersuisut nalilersueqqinnissaat pissusissami-suussaaq. Taamatut nalilersueqqinneq immaqalu aasaanerani nalunaaquttamik atorunnaarsitsinissaq inatsisitigut atugassarititaasut iluini pisinnaavoq.

Aalajangiiffigisassatut siunnersuummut oqaaseqaatigineqartut innersuussutigalugit Naalackersuisut inassutigissavaat siunnersuut Inatsisartunit itigartitsissutigineqassasoq.